

Das teglich Gebet

Brenz, Johannes

Vorwort

Wieder einmal ging ein Jahr vorüber, und wir befinden uns im Jahr 2021 – nach einem sehr chaotischen Jahr geht es weiter.

Dieses Jahr hat uns allen eine Menge abverlangt – doch Gott hat uns hindurchgetragen.

Für mich persönlich bot die Zeit, die ich gewonnen habe, die Gelegenheit, einige neue Bücher zu erstellen. Gleichzeitig überarbeite ich viele der alten Bücher, sei es, um Fehler zu beheben oder neue Inhalte hinzuzufügen.

Vielleicht hat aber auch der eine oder die andere Lust, mitzumachen und neue Bücher zu erstellen – spricht mich einfach an.

Euch allen wünsche ich Gottes reichen Segen und dass Ihr für Euch interessante Texte hier findet. Für Anregungen bin ich immer dankbar.

Gruß & Segen,

Andreas

Brenz, Johannes - Das teglich Gebet,

so vnser HERR JHesus Christus selbst gelehret hat/ das man das Vater vnser nennet/ Ausgelegt durch Herren Johan. Brentium/ vnd newlich mit fleisse verdeuscht/ Durch Stephanum Agricolam/ Pfarrherren zu Helber/ in der Herschafft Manssfeldt.

PSAL: 50.

Ruffe mich an jnn der zeit der not/ so wil ich dich erhören/ so soltu mich preisen.

M. D. L.

ES ist die heilige schrift/ hin vnd wider vol schöner herlicher Gebet vnd Psalmen/ ja ein eigen buch wirdt darinnen begriffen/ das man den Psalter nennet/ darin jr ein grosse anzal/ zu hauff gesammelt sindt/ welche alle zu wissen/ vnd nach gelegenheit zu beten/ sehr nütze vnd not sind. Aber gleich wie CHRISTus/ das gantze Gesetze/ jnn eine kurtze Summa verfast hat/ als er spricht/ Liebe Gott deinen HERREN/ von gantzem hertzen/ von gantzer seele/ vnd allen krefftten/ vnd deinen Nechsten als dich selbst/ das ist das gantze Gesetz/ vnd die Propheten. Also hat er auch jnn eine kurtze Summa geschlossen vnd verfast/ alle Psalmen/ vnd alle Gebet/ aller heiligen leute/ jnn dem gebet/ das er gelehret hat/ welches man das Vater vnser nennet. Vnd ist kein ding/ das Gott jemals den seinen verheissen/ oder das mit Gebet von jm erlangtwerden mag/ das nicht in einer bitte/ dieses kurtzen Gebets begriffen sey.

Es hab aber dieses Gebet zwey theile/ Das erste ist eine Vorrhede/ Das ander sind sieben Bitte/ ordentlich nacheinander/ die Vorrhede aber laut also.

[Vater vnser der du bist im Himmel.](#)

Diese Vorrhede reimet sich sehr wol/ beide auff den Menschen der da betet/ vnd auff Gott den man bittet. Denn wenn wir Gott einen Vater nennen/ so wird bald vnser glaube dadurch gesterckt/ das wir vnser not/ mit fröhlichem hertzen/ Gott dürffen fürtragen/ vnd jn darumb vmb hülff anrufen/ Denn so Gott vnser Vater ist/ so tregt er auch one zweiffel ein Veterlich hertz gegen vns. Ein Veterlich hertz aber/ ist willig/ seinem Kindt in allen nöten zu helffen. Zu frembden leuten darff man sich solchs willens nicht allezeit versehen/ Aber zu einem Vater mag man sichs wol versehen. Aber da

gedenckt ein Mensch/ Ich habe Gott den Vater oftmals erzürnet/ vnd fürchte/ er hab mich der kindschafft gantz entsatzt/ vnd enterbet/ kann derhalben nicht hoffen/ das er mich erhören werde. In dieser anfechtung müssen wir vns an den HERren CHRISTVM halten/ Denn derselbig hat vns geheissen/ Gott als ein Vater anruffen/ vnd weil er die warheit selbst ist/ wird er on zweiffel vns nicht han heissen oder lernen liegen. Denn er hat vns mit Gott versünet/ vnd erlangt/ das Gott zu Kindern wil annemen/ alle die an ihn gleuben. Darumb wenn vns vnser sünde wöllen vom Gebet abschrecken/ so sollen wir vns an vnsern HERren CHRISTVM halten/ der vnser sünde ausgetilget/ vnd versünet hat/ vnd mit festem glauben/ Gott vmb hülffe anruffen.

Hierzu dienet auch/ das da folget/ Der du bist im Himmel/ Denn dardurch wird auch vnser glaube gestercket. Ein jeglicher Mensch hat auch ein Vater auff erden/ Aber dieselben hülffen wol oft gern jren Kindern in nöten/ können aber nicht. Etliche köndten zu zeiten wol/ wöllen aber aus vnfreundtlichkeit nicht. Im Himmel aber/ da haben wir ein solchen Vater/ der da vns/ weil er vnser Vater ist/ wil helffen/ vnd weil er im Himmel ist/ kan helffen/ denn er ist Allmechtig/ Er spricht/ Himmel vnd Erden erfülle ich/ Vnd weiter/ Der Himmel ist mein stuel/ vnd das ERdreich der fuszschemel meiner füsse/ das ist/ ich bin Allmechtig.

Wenn wir nu im anfang des Vater vnser/ Gott ein Vater im Himmel nennen/ so sollen wir damit vnsern glauben stercken/ vnd gewiss werden/ das Gott vns wölle vnd könne erhören/ vnd jnn allen nöten helffen.

Es dienen auch diese Tittel vnd namen Gottes/ (das wir jn ein Vater im Himmel nennen) nicht allein dazu/ das wir damit vnsern glauben stercken/ sondern sie bewegen auch Gottes hertze/ das er vns erhöret/ Denn wenn man Gott einen Vater nennet/ so erwecket man sein Veterlich hertz gegen vns/ also/ das er nicht lassen kan/ er mus sich vnser/ seiner kinder/ annemen/ vnd Veterliche trewe erzeigen. Denn Gottes veterlich hertze gegen vns/ vber trifft weit alle natürliche hertzen der Eltern/ gegen jren Kindern/ in dieser welt/ Denn so spricht er durch den Propheten Esaia/ Kan auch ein Mutter jhres Kindes vergessen/ das sie sich nicht jhres fleischs vnd bluts erbarme? Vnd so die selbe schon würde vergessen/ wil ich doch dein nicht vergessen. Vnd CHRISTVS/ Wo bittet vnter euch ein Sohn den Vater vmb brod/ der jm einen stein dafür biete? Vnd so er vmb ein fisch bittet/ der jm ein Schlange für den fisch biete? Oder so er vmb ein Ey bittet/ der jm einen

Scorpion dafür biete? So denn ihr/ die jr arg seidt/ köndt eweren kindern gute gaben geben/ Viel mehr wird der Vater im Himmel/ den heiligen Geist geben/ denen die jn bitten.

Darumb kan man Gottes hertze nicht besser (das er sich vnser erbarme) bewegen/ denn wenn man jhn jnn rechtem glauben ein Vater nennet.

Es stehet auch in dieser Vorrhede/ das wort VNSER/ welchs auch vnsern glauben hilfft stercken/ vnd ermanet vns darneben/ brüderlicher liebe. Denn erstlich/ weil Christus vns alle jnn das wort Vnser schleusset/ seiget er klerlich an/ das eine Gemeinschaft der Heiligen sey/ vnd das sie auch alle in gemein miteinander beten/ vnd das ein jeglicher nicht für sich allein/ im Vater vnser bete/ sondern auch für alle glieder der heiligen Christlichen Kirchen. Wo aber nicht nur einer allein für sich bete/ sondern ihr viel für einander/ miteinander beten/ da wird ja der glaube eines Christen so betet/ desto mehr gestercket vnd vergewisset/ das er erhöret werde. Zum andern/ vermanet vns auch das wort Vnser/ zu brüderliche liebe/ Denn weil wir alle einen Vater im Himmel haben/ Warumb verachten wir denn aus hochmut einander? Warumb sind wir so neidisch vntereinander? Warlich/ wer seinen Nechsten verachtet oder neidet/ der kan/ wie sehr er sunsten schreiet/ das Vater vnser nicht recht anfahen/ vnd viel weniger damit etwas erlangen. Dieses ist kürztlich der inhalt der Vorrhede/ Nu folgen die sieben Bitt ordentlich nacheinander.

I. Geheiliget werde dein Name.

IN dieser Bitte/ bitten wir nicht/ das Gottes Name an sich selbst heilig werde/ dieweil er/ wol on vnser bitte/ allezeit heilig gewest ist/ noch ist/ vnd in ewigkeit sein wird. Sondern wir bitten/ das er bey vns/ vns in vns/ geheiliget werde. Geheiliget werden aber/ heist hie offenbart/ geehret/ gepreiset/ gros geachtet/ vnd recht erkandt werden. Denn so spricht Gott im Ezechiel/ Ich wil herlich/ heilig/ vnd bekandt werden für vielen Heiden/ das sie erfahren sollen/ das ich der HERRE bin. Gottes Namen aber ist/ wie wir im andern Buch Mosi am XXXIII. Capittel haben/ barmhertzig/ gnedig/ geduldig/ vnd von grosser gnad vnd trew/ der da heimsucht die Missethat der Vetter/ auff Kinder vnd kindskinder/ bis ins dritte vnd vierde glied. Vnd an andern örtern der schrift/ wirdt Gott Allmechtig/ Weise/ Gerecht/ Langmütig rc. genandt. So bitten wir nu in dieser bitt/ Erstlich/ das vns die herligkeit gemelter namen Gottes/ offenbart/ vnd von vns recht erkandt werde. Denn wenn wir in nöten vnd trübsal sind/ gleuben wir aus eigener natur nicht/ das

Gott so gnedig vnd barmhertzig sey/ das er vns darin helffen wölle. Wenn wir eusserlich keine hülffe sehen/ gleuben wir nicht/ das Gott so mechtig sey/ das er vns könne helffen/ vnd so weise vnd klug/ das er vns wisse zu helffen. Wenn es aber wol gehet/ vnd Gottloses wesen ein glücklichen fortgang hat/ so gleuben wir nicht/ das Gott so ein strenger Richter sey/ der das böse nicht wölle vngestraft lassen/ vnd gedencken/ Der Teuffel ist nicht so scheuslich/ als man jhn malt/ vnd die Helle nicht so heis/ als man davon sagt. Wenn Gott seine verheissung verzeuhet/ vnd nich so baldt hilfft/ wie wir wölle/ so gleuben wir nicht/ das er so warhafftig sey/ das er werde halten/ was er verheissen hat/ Vnd jnn summa/ es gehe vns wol oder übel/ so erkennen wir nicht/ wie wir solten/ die herligkeit vnd heiligkeit Gottes Namen.

Derhalben bitten wir in dieser ersten Bitt/ das vns Gott seines Namens herligkeit vnd heiligkeit/ wölle offenbaren vnd erkleren/ das wir jhn recht erkennen/ vnd dardurch vnsern glauben stercken.

Zum andern/ weil Gott seinen Namen offenbart/ vnd zu erkennen gibt/ Erstlich/ durch die predigt seines heiligen Worts. Zum andern/ durch mancherley Mirackel vnd Wunderzeichen. Zum dritten/ mit viellerley Exempeln seiner Göttlichen werck. So bitten wir auch in dieser bitt/ das Gott bey vns die predigt seines heiligen Göttlichen Worts offenbaren/ vnd erhalten wölle/ vnd seine gnade geben zu alle dem/ das zu erhaltung des Predigampts/ Göttliches Worts gehöret. Das er seine wunderwerck erleuchte/ vnd herlich mache bey vns/ vnd viel Exempel gebe/ daraus man die herligkeit seines Namens erkennen möge.

Zuletzt/ Dieweil Gottes Namen geunehretwirdt/ durch Vnglauben/ Gottloses wesen/ Abgötterey/ Zauberey/ Ketzerey/ Heuchley/ stoltz/ hochmut vnd vnchristliches leben der Christen. So bitten wir in dieser Ersten Bitte/ das Gott wölle öffentlich vnd heimlich/ ausrotten vnd tilgen/ allen vnglauben/ alles Gottloses wesen vnd Abgötterey/ alle Zauberey vnd Ketzerey/ alle Heuchley/ Hochmut vnd vnchristlichs lebne der Christen/ Das jr Liecht leuchte für den leuten/ das sie jre gute werck sehen/ vnd Gott den Vater im Himmel preisen/ Also hastu nun diese kurtze bitt/ darinnen aber viel mehr vnd grösser ding begriffen ist/ denn man kürztlich anzeigen kan. Denn in dieser bitte gehören alle Psalmen vnd Gebet/ darinnen man betet/ vmb ausbreitung Göttlicher ehre/ das Gott sein Angesicht vber vns erleuchten wölle/ vnd sein lob in die gantze welt ausbreiten.

II. Zukomm dein Reich.

WAS ist das? Hat nicht Gott von anfang der welt regiert? Warumb heist er vns denn allererst bitten/ das sein Reich komme? Man mus hie mercken/ das diese bitte nicht redet von dem Reich Gottes/ damit Gott vber alle ding/ in Himmel vnd Erden/ gewaltiglich regieret vnd herschet. Denn dieses Reich ist von anfang der welt gewest/ Sondern von dem Reich/ das Gott durch die Propheten verheissen hat/ auff Erden zu offenbaren/ vnd durch seinen Messiam auff zurichten vnd regieren/ Von welchem Reich prediget Esaias/ Sein herschafft wird gros werden/ vnd des friedes kein ende/ auff dem stuel Daud/ vnd seinem Königreiche/ das ers zurichte vnd stercke/ mit Gericht vnd Gerechtigkeit/ von nu an bis in ewigkeit. Vnd Daniel/ zur zeit solcher Königreich/ wird Gott von Himmel ein Königreich auffrichten/ das nimmermehr zurstöret wirdt/ vnd sein Königreich wird auff kein ander volck kommen/ Es wird alle diese Königreiche zumalmen vnd zustören/ Aber es wirdt ewiglich bleiben. Denn nicht allein die heilige schrift/ im Daniel/ sondern auch die historien der Heiden/ zeigen an/ das vier grosse Reich oder Monarchien/ jnn dieser Welt gewest sindt/ Das erste/ das Babilonische reich/ Dan ander/ der Persen/ Das dritt/ der Kriechen/ Das vierde/ der Römer. Neben diesen grossen Reichen/ sind auch etliche geringere Königreiche gewest/ Denn Pharao hatte ein eigen Königreich in Egypten/ Daud in Canaan/ vnd andere König an andern örten. Aber diese Reich/ wie gewaltig/ heilig vnd ehrlich sie gewest sind/ haben sie doch jhre Vnterthanen nicht warhafftig gerecht/ vnd glücklich machen können/ vnd hat der Teuffel bey jnen jimmerzu also geherschet/ das man bey jnen allezeit Gottloses wesen/ vngerechtigkeit/ armut/ trübsal/ elend/ kranckheit/ Tod vnd verderben gefunden hat. Darumb hat Gott durch seine Propheten/ ein ander Reich verheissen/ das man das Himmelreich/ odder Gottes Reich nennet/ darinnen Messias regieren sol/ jnn welchem Reich/ kein Gottlos wesen/ vnrecht/ armut/ not/ elendt/ kranckheit/ Todt vnd verderben sein sol/ sondern eytel Gerechtigkeit/ glück vnd seligkeit.

So heist vns nun CHRISTus/ in dieser andern bitte/ bitten/ das dieses Himlisch Reich bey vns offenbart werde. Es wird aber offenbart/ erstlich/ durch die predigt des heiligen Euangelij/ Darnach durch die andere zukunfft CHRISTI am Jüngsten tage.

Derhalben bitten wir erstlich in dieser bitt/ das Gott die predigt des heiligen Euangelij von Jhesu CHRISTO/ jnn der gantzen Welt erhalten wölle/ vnd

darnach/ das Christus mit seiner letzten zukunfft/ nicht lange wölle aussen sein/ auff welcher wir warhafftig empfahen werden/ alles was vns die wort des heiligen Euangelij jetzt zusagen vnd verheissen/ vnd wir durch den glauben fassen. Denn gleich wie/ wenn es jnn weltlichen Regimenten übel vnd vnordentlich zugehet/ jederman ein versamlung der Obersten/ oder ein Reichstag wüdschet vnd hoffet/ darinnen mit gemeinem rath derselbigen/ was gefallen ist/ vnd in vnordnung kommen/ wider auffgericht/ vnd in rechte ordnung gebracht werde/ Vnd wie jederman/ wenn sich jrrung in Religion sachen zutragen/ auff ein Sinodum oder concilium appelliert/ Also auch/ weil es so veracht vnd vbel zugehet/ in allen Regimenten diser welt/ so wüdschen vnd bitten alle fromme Christen/ von gantzem hertzen/ das das Reich Christi/ das ist/ der Jüngste tag komme/ welcher tag/ gleich als ein gemeiner Reichstag vnd Concilium/ der gantzen Welt sein wird/ auff welchem alle Göttliche ordnung/ die der Teuffel jnn dieser welt verwüset vnd zerstöret hat/ wider auff die neue angerichtet werden sollen/ also/ das sie hernach in ewigkeit/ nicht sollen können widerumb abgebracht vnd zerstöret werden/ Vnd dis ist das erste/ das man bittet in dieser bitte. Zum andern/ bitten wir/ das Gott jnn vnserm sterblichen leibe herschen wölle/ vnd dem Teuffel/ der vns auch gern vnter sein Regiment haben wölte/ wehren. Denn dieweil wir in sünden entpfangen vnd geborn sind/ so herschet der Teuffel vber vns/ vnd treibet vns zu sunden/ vnd in ewigs verderben. Darumb bitten wir in dieser bitte/ das Christus den Teuffel austreiben/ vnd in vns herschen wölle/ auff das wir vnser glieder begeben zum dienste der gerechtigkeit/ auff das wir heilig werden/ vnd das ewige leben erlangen.

III. Dein wille geschehe auff Erden/ wie im Himel.

IN dieser bitte/ bitten wir nicht/ das der allmechtige vnd vnerforschliche wille Gottes geschehe/ an sich selbst/ das Gott thue/ was er wölle. Denn wer kann Gott wehren/ vnd hindern/ das er nicht thue was er wölle? Sondern wir bitten/ das der wille Gottes/ den er vns erkleret vnd offenbaret hat/ in vns/ vnd durch vns geschehe. Denn Gottes wille ist zweierley. Erstlich/ ein Allmechtiger vnd vnerforschlicher wille/ damit er alle ding/ auff Erden vnd im Himmel/ ordnet vnd regieret. Dieser wille hat seinen fortgang/ wir wöllen oder nicht/ vnd bedarff auch vnser bittens nicht/ Sondern wir sollen jhn loben/ ehren vnd preisen. Darnach ist ein wille Gottes/ den er selbst erkleret vnd offenbart hat/ den kan man erforschen/ vnd ist der/ den er durch sein Göttlich wort offenbaret vnd erkleret hat. Erstlich durch Mosen/ vnd die

Propheten/ darnach durch CHRISTVM vnd die Apostel. Durch Mosen hat er vns lassen anzeigen/ wir sollen seine Gebot halten/ vnd gute werck thun/ vnd wenn wirs nicht vollkömlich thun können/ so sollen wir vns für sündler erkennen. Durch CHRISTVM/ hat er vns lassen anzeigen/ er wölle haben/ das wir alle trübsal/ angst/ not vnd widerwertigkeit/ gedültig leiden vnd tragen. So bitten wir nun jnn dieser bitte/ das vns Gott seinen heiligen Geist geben wölle/ der vns helffe/ das wir gleuben/ was er wil haben/ das wir gleuben sollen/ Vnd thun/ was er haben wil/ das wir thun sollen/ Das wir leyden mit gedult/ was er haben wil/ das wir leiden sollen. Wie aber solcher wille in vns geschehen sol/ folget/ Auff Erden wie im Himmel. Es sindt aber zweierley Himmel/ ein Geistlicher vnd ein Leiblicher. In dem Geistlichen Himmel sind die Engel/ welchs sind dienstbare Geister/ die alle augenblick/ alles nach Gottes willen thun. Als der Engel/ Hierusalem mit dem schwerdt der Pestilentz schlug/ gebot jm Gott/ vnd sprach/ Es ist genug/ Las nu deine hand ab/ Vnd als bald war jhm der Engel gehorsam/ vnd höret die plage auff/ von dem volck Israel. Als Gott dem Engel gebote/ er solte im Lager der Assyrier/ viel tausend Mann erwürgen/ Sihe/ da fuhr der Engel des HERren/ in derselben nacht aus/ vnd schlug im Lager von Assyrien/ 185000. Mann. Was ists aber noth/ das wir mehr Exempel anzeigen/ wie die Engel Gott gehorsam sind/ weil die gantze heilige Schrift/ wo sie von den Engeln redet/ gemeinlich solchen gehorsam lobet vnd herfür zeucht.

In dem Leiblichen Himmel/ sind Sonn/ Mond/ Sternen/ welche alle auch nach Gottes willen sich richten/ Er spricht zur Sonnen/ (sagt Job) so gehet sie nicht auff/ vnd versigelt die sterne/ Er decket den blitz/ wie mit henden/ vnd heists doch widerkomen/ Er spricht zum schnee/ so ist er bald auff Erden/ Vnd zum Platzregen/ so ist der Platzregen da mit macht. In summa/ es ist nichts/ beide in dem Geistlichen vnd Leiblichen Himmel/ das nicht Gott in allen dingen gehorsam leiste. So bitten wir also jnn dieser bitt/ das vns Gott seinen heiligen Geist wölle geben/ der da in vns wircke/ das wir jrdischen Creaturen/ seinem willen/ also gehorsam seyen/ wie ihm die Himlischen Creaturen gehorsam sind. Ob aber wol solcher gehorsam/ in diesem leben nicht kan vollkömlich geleistet werden/ so kan er doch durch die erstlinge des geistes angefangen werden/ also/ das wir in jhenem leben/ des zehenden des Geistes theilhaftig werden/ vnd geniessen mögen.

III. Vnser teglich Brodt gib vns heute.

OB wol in dieser bitt allein des brots gedacht wird/ dadurch wir ernehret/ vnd in diesem sterblichen leben erhalten werden/ so wird doch darunter begriffen/ alles/ was zu erhaltung dieses leiblichen lebens not vnd nütze ist. Erstlich aber ist not/ Weltliche Obrigkeit/ durch welche fried vnd ruhe erhalten werde/ das man das teglich brot on hindernis/ mit erbeit gewinnen vnd erwerben könne. So bitten wir nu jnn dieser bitt/ das vns Gott wölle fromme vnd weise Obrigkeit geben/ die gemeinem nutz wol können fürstehen.

Darnach bedarff man auch zum teglichen brodt/ Eltern vnd Fürmünder/ sonderlich wenn wir noch Kinder oder Weysen sind/ die jhnen selbst noch nicht rathen noch fürstehen können/ Vnd bitten also auch jnn dieser bitt/ alle Kinder für ihre Eltern vnnnd Formünder. Wenn man im Haushalten/ die narung oder das teglich brod erwerben sol/ so bedarff ein Mann eines Weibes/ vnd ein Weib eines Mannes/ Darumb bitten auch in dieser bitte/ die Eheleut/ eines für das ander/ das es jhm wolgehe. Zum teglichen brodt/ mus man haben den Ackerbaw/ Schuster/ Schneider/ Zimmerleut/ vnd allerley Handwerck/ Derhalben bitten wir auch in dieser bitte/ für alle getrewe/ fromme Erbeiter/ Bawren vnd Handtwercksleut. Wir müssen auch zum Haushalten/ Meygde vnd Knechte haben. Darumb bitten wir/ das vns Gott wölle getrewe Gesinde bescheren. Darneben bedarff man auch/ Gesundheit des leibs/ gesunde Lufft/ Regen, schön Wetter/ gedeyhen vnd glück zum Viehe/ vnd viel anders mehr. Wenn wir nu vmb das teglich Brodt bitten/ so bitten wir/ das vns Gott gesundheit des leibs/ gesunde lufft/ fruchtbar gewitter/ verleyhen wölle/ vnser viehe/ vnd was wir sonst haben/ behüten/ vnd was vns sonst not ist/ das wir eher können gedencken denn aussprechen.

Hie ist aber zu mercken/ Erstlich/ das vns diese bitt vermanet/ der grossen gnad vnd gütigkeit Gottes gegen vns. Denn weil Jhesus CHRISTVS Gottes Sohn/ vns heist vmb das teglich brodt bitten/ so zeigt er klerlich an/ das vnser HERre Gott/ vns verheissen habe zu geben/ alles/ was zu vnserm enthalt/ vnd vnser narung gehöret.

Zum Andern/ ermant auch dise bitt/ vns vnser selbst/ was wir sind. Denn weil vns CHRISTVS heist vmb das teglich brod bitten/ zeigt er deutlich an/ das wir alle für Gott Bettler sindt/ Denn ob gleich jhr viel sind/ die grosse Reichthumb haben/ so haben sie doch dieselben nicht von sich selbst/ sondern aus Gottes Barmhertzigkeit/ vnd wie man sagt/ als ein Bettler ein

Allmosen/ vnd wo Gott nicht seinen Segen dazu gibt/ so gehets/ wie der Prophet sagt/ Sie essen/ vnd werden nicht sat.

Dazu/ weil hie das wort Vnser stehet/ werden wir vermant zu brüderlicher lieb. Denn weil dieses gebet/ nicht eines menschen allein/ sondern jnn gemein/ aller Christen ist/ wird angezeigt/ das die narung/ die wir aus Gottes gnaden haben/ nicht allein durch vnser/ oder eines andern/ oder zwene bitte/ erlangt/ sondern durch aller frommen Christen gebet. Weil aber vnser narung/ also durch aller Christen gebet/ vns von Gott ist erlangt worden/ so sollen wir ihn auch damit gern jnn jhren nöten zu hülff kommen/ als denen/ die vns dieselbe vnser narung haben helfen erwerben.

Zu letzt/ können wir auch dieser bitte gebrauchen/ wider die Gotlose/ vnchristliche sorge/ für die narung/ denn hie heisset vns Christus vmb vnser teglich brodt bitten. Zeiget damit an/ das Gott alle tage einem jeden Christen/ sein brodt/ dadurch er im leben ernehrt vnd erhalten werde/ verordne/ vnd bereit verordnet habe. Weil dir nu Gott deine Narung teglich also verordnet/ Was bedarffestu denn stelen/ raubens/ betriegens? haben wir doch hie das Vater vnser/ darin vns Gott heist/ vmb vnser teglich brodt bitten/ vnd zeigt an/ das er vns verheissen habe/ teglich so viel als wir bedürffen/ zu geben. Darumb las ab von betriegerey/ vnd such das Reich Gottes/ vnd seine Gerechtigkeit/ das ist/ Warte deines ordentlichen beruffs/ in rechtem glauben/ so wird dir/ was zur narung gehöret/ alles zufallen.

V. Vergib vns vnser Schulde/ als auch wir vergeben vnsern schuldigern.

IN der nechsten bitte/ haben wir gebeten für alles/ das not ist/ dis leibliche leben zu erhalten.

In dieser bitte/ bitten wir nur für alles das noth ist/ zu erhalten das Geistliche vnd ewige leben/ Denn was were vns dieses zeitliche leben nütze/ wenn wir nach diesem leben ewiglich verderben müsten? Das ewig leben aber zu erhalten/ ist für allen dingen not/ vergebung der sünde. Wol dem/ spricht Daud/ dem die vbertretung vergeben sindt/ dem die sünde bedeckt sindt/ Wol dem menschen/ dem der Herre die Missethat nicht zurechnet.

Vergebung aber der sünde zu erlangen/ ist erstlich not/ Christus/ denn der allein hat die sünde ausgetilget/ vnd allein vmb seinet willen/ werden die sünde vergeben. So bitten wir nu in dieser bitt/ vmb rechte erkendtnis

Christi/ durch welche man vergebung der sünde erlangt. Zum andern ist auch not/ der glaube in Christum/ Denn wenn du nicht in Christum gleubest/ so ist dir Christus nichts nütze. Darumb bitten wir auch in dieser bitte/ das vns Gott durch seinen Heiligen Geist/ verleihen vnd geben wölle/ ein rechten starken glauben in Jhesum Christum. Zum Dritten/ sind auch not/ zu vergebung der sünden/ die predigt des heiligen Euangelii/ vnd die heiligen Sacrament/ durch welche instrument vnd werckzeug/ Christus vns den glauben gibt vnd bestetigt/ Wenn wir nu vmb vergebung der sünde bitten/ so bitten wir auch/ das Gott das Predigamt seines heiligen Euangelii/ vnd rechten gebrauch der heiligen Sacrament/ erhalten wölle/ daraus wir ein festen/ starken glauben fassen mögen/ das wir durch Christum/ vergebung der sünde/ vnd ewiges leben haben. Was bedeut aber der anhang/ Wie wir vergeben vnsern schuldigern? Ist das werck/ das wir vnserm Nechsten/ der wider vns gesündigt hat/ vergeben/ so ein gros werck/ das man vergebung der Sünde bey Gott dadurch erlangt? Nein/ denn also were Christus nichts nütz. Es wird aber angehangen/ als ein zeichen/ dadurch wir sollen vnsern glauben/ von vergebung der sünde/ probirn vnd erkennen/ Denn wenn wir wöllen vergebung der sünde haben/ so müssen wir gleuben/ das wir sie durch CHRISTVM erlangen/ Gleuben aber heist nicht allein meinen/ wissen/ verstehen gedencken/ das Christus gelitten habe/ sondern heist/ ein fest vnd starck vertrauen jnn CHRISTVM haben. Es ist aber schwer schwer zu erkennen/ ob wir ein solchen glauben in Christum haben/ Darumb/so setzt vns Christus allhie ein zeichen/ daraus wir erkennen können/ ob wir ein solch fest vnd starck vertrauen in Christum haben. Denn wenn wir befinden/ das wir von hertzen vnsern Feinden vergeben/ was sie vnrecht vnd übel wider vns gethan haben/ os ists ein gewis zeichen/ das wir recht vnd warhafftig gleuben/ das Gott vns vmb Christi willen/ vnser sünde vergeben habe.

Wenn wir aber vns gedencken/ an vnserm Nechsten zu rechen/ vnd wöllen jhm nicht vergeben/ so ists ein zeichen/ das der glaub in vns/ nicht ein feste zuuersicht/ sondern schlecht ein fleischlicher wahn ist/ Wer da spricht/ sagt Johannes/ Ich liebe Gott/ vnd hasset seinen Bruder/ der ist ein Lügner. Darumb spricht auch CHRISTus im Marco/ Wenn jhr stehet vnd betet/ so vergebet/ wo jhr etwas wider jemandt habt/ Auff das auch ewer Vater im Himmel/ euch vergebe ewere feyle/ Wo jhr aber den menschen jhre feyle nicht vergebet/ so wird euch ewer Vater im Himmel ewere feyle auch nicht vergeben.

An einem andern ort/ wirdt der Knecht/ dem der Herr alle seine grosse schuldt vergeben hatte/ vnd wolte seinem Mitknecht ein geringe schuld nicht vergeben/ ins gefengnis geworffen/ Vnd Christus verbeut auch dem/ der etwas wider seinen Nechsten hat/ den Altar/ Viel mehr wird jhm freylich auch das Gebet verboten sein? Ich wil/ spricht Paulus/ das die Menner beten an allen örten/ vnd auffheben heilige hende/ ohn zorn vnd zweiffel. Wie kan aber der ein reine hand haben/ der seinen Bruder hasset? Dieweil der/ so seinen Bruder hasset/ (wie Joannes sagt) ein todtschleger ist/ so sindt freylich seine Hende voll bluts. Darumb/ da vns Christus heisset in dieser fünfften bitt sagen/ Wie auch wir vergeben vnsern schuldigern/ Ist nicht die meinung/ das wir solten mit vnsern wercken/ vergebung der sünde erlangen/ Sondern wird vns fürgestellt/ als ein zeichen/ dabey wir können erfahren/ ob wir ein rechten/ festen/ starcken glauben haben/ durch welchen wir allein/ vmb Christi willen/ vergebung der sünde erlangen. Vnd vermanet vns/ das wir zum gebet/ nicht allein die liebe Gottes/ sondern auch die liebe des Nechsten bringen sollen.

VI. Vnd füre vns nicht ein in versuchung.

Das man diese bitte recht verstehe/ mus man mercken/ das der Teuffel so ein vnruiger Geist ist/ das er alle augenblick/ vnser Seligkeit mit liste nachstellet/ vnd wo er kan vns zu Gottlosem wesen/ zu sünden vnd in verderben treibt/ Er gehet herumb/ spricht Petrus/ wie ein brüllender Lawe/ vnd sucht wen er verschlinge. Dazu/ so ist er auch ein alter feindt/ Es sindt nu schier Sechs tausent Jhar/ das er stets den menschen angefochten hat/ vnd hat nu aus aolcher übung gelernt/ allerley tückische griffe/ damit er den menschen versühe/ vnd zu fall bringe. Was vns jnn dieser Welt geschicht vnd widerferet/ glück odder vnglück/ fröligkeit odder trawrigkeit/ leben oder tod/ das brauchet der Teufel alles zum Instrument vn werckzeug/ das er vns damit versühe/ vnd zu sünden reitze. Als zum Exempel/ ist der Mensch Reich/ so ist bald der Teuffel da/ vnd reizet jhn dadurch/ das er Gott vnd seinen Nechsten verachte. Ist er Arm/ so reizet jhn der Teuffel/ das er sol die Leut betriegen/ stelen/ rauben/ falsch schweren. Ist der Mensch in grossen Ehren/ so heist jhn der Teuffel stoltz werden/ vnd keinem Menschen kein dienst thun. Ist er jnn schandt/ so reizet jhn der Teuffel zu fluchen vnd verzweifeln. Ist der Mensch Jung/ so reizet jhn der Teuffel/ den lüsten der jugent nachzufolgen/ vnd nach seiner Seelen seligkeit nichts fragen/ bis ins alter. Ist er Alt/ so treibet jhn der Teuffel zum Geitz. Ist der Mensch gesundt/ vnd

lebet jnn frewden/ so treibet jhn der Teuffel zu fleischlicher sicherheit vnnd verachtung Göttlichs Worts. Ist der Todt vorhanden/ so reizet der Teuffel zur verzweiffung. Inn Summa/ es ist nichts so gros/ nichts so klein/ nichts so hoch/ nichts so gering/ der Teuffel brauchts zum werckzeug/ damit er vns versüche/ vnd zu sünden vnd Gottlosem wesen reitze/ dadurch wir in ewige verdammis gestürtzet werden. So bitten wir nu jnn dieser Sechsten Bitte/ das vns Gott wölle schützen/ vnd behüten/ vnd nicht zugeben/ das wir durch den Teuffel eingefürt vnd verfürd werden/ jnn versüchung/ ergernisse/ vnd reitzung des Teuffels/ zu Gottlosem wesen/ vnd vnserm verderben/ Darauff folget die siebende vnd letzte bitt.

VII. Sondern erlöse vns vom übel.

Diss ist ein gemeine bitt/ vnd begreiff jnn sich allerley bitte. Man verstehe durch das wort übel/ den Teuffel/ oder sonsten allerley übel/ So ist doch gewis/ das wir in dieser Bitte bitten/ das vns Gott helffen vnd erhalten wölle/ jnn alle dem/ das er weis/ das es vns zum schaden des Leibs oder der Seelen gereichen mag. Denn wir (wie S. Paulus sagt) wissen nicht was wir beten sollen/ wie sichs gebürt/ können nicht verstehen/ was vns nütz oder schad ist. Einer meinet/ es were jhm nütze/ das er gesundt were/ das doch wol sein verderben were. Ein ander meinet/ armut sey ihm schedlich/ vnnd ist doch wol sein höchster nutz. Einer meinet/ grosse ehre werde jhm nütze sein/ die jhm doch zu höchster schande gereicht. In Summa/ Wir können nicht verstehen aus eygner natur/ was jnn dieser Welt gut oder böse sey. So bitten wir nu jnn dieser bitt/ das vns Gott wölle vom übel erlösen/ nicht von dem/ das wir döse vnd übel achten/ aus vnsers fleischs vernunfft/ sondern das Gott warhafftig für übel helt.

Diss ist kürztlich der jnnhalt des Vater vnsers/ welches ein kurtzer begriff ist aller Christlicher Gebet. Im Mattheo stehet zum beschlus hinenan.

Denn dein ist das reich/ vnd die krafft/ vnd die herrligkeit in ewigkeit/ Amen.

Dieser beschlus ist nicht one nutz vnd vergebens hergesetzt/ Denn jnn der Vorrhede droben/ hat vns CHristus gelehret/ Gott ein Vater zu nennen/ mit welchem wort er vns angezeigt hat/ das vns Gott wölle helffen/ erhören/ vnd thun was wir bitten. Hie nu am ende/ wird durch diese wort beschriben/ die Allmechtige Herrligkeit Gottes/ vnd angezeigt/ das er nicht allein vns wölle/ sondern könne/ auch helffen/ beschützen/ vnd thun/ was wir von

jhm gebeten haben. So last vns nu/ lieben Christen/ dieses Gebet annehmen/
vnd mit rechtem vnd starcken glauben brauchen/ es gehe vns wol odder
übel/ wir eyen im leben oder im todt/ Last es vns/ sag ich/ bringen für das
angesicht des HERREN vnsers Gottes/ jnn rechtem glauben/ Er ist aber ein
gütiger Vater/ vnd kennet die wort seines Sohnes Jhesu CHRISTI. Wie er
nu seinen Sohn erhöret hat/ vnd hat jhm gegeben ein Namen/ der da ist vber
alle Namen/ Also wird er auch zu ewiger Seligkeit erhören/ alle die jhn im
glauben/ auff seinen Sohn JHEsum CHRISTum anruffen/ Dem sey lob vnd
ehr/ miz Vater vnd heiligem Geist/ von ewigkeit zu ewigkeit/ Amen.

*Zu Erfurdt Trückts Wolffgangus vnnd Geruasius Sthürmer/ Gebrüder/ zu
dem Buntten Lawen/ bey S. Paul.*

Quellen:

Sämtliche Texte sind der [Glaubensstimme](#) entnommen. Hier sind zumeist auch die Quellangaben zu finden.

Die Bücher der Glaubensstimme werden kostenlos herausgegeben und dürfen kostenlos weitergegeben werden.

Diese Bücher sind nicht für den Verkauf, sondern für die kostenlose Weitergabe gedacht. Es kommt jedoch immer wieder zu Fragen, ob und wie man die Arbeit der Glaubensstimme finanziell unterstützen kann. Glücklicherweise bin ich in der Situation, dass ich durch meine Arbeit finanziell unabhängig bin. Daher bitte ich darum, Spenden an die **Deutsche Missionsgesellschaft** zu senden. Wenn Ihr mir noch einen persönlichen Gefallen tun wollt, schreibt als Verwendungszweck „Arbeit Gerald Haupt“ dabei – Gerald ist ein Schulkamerad von mir gewesen und arbeitet als Missionar in Spanien.

Spendenkonto: **IBAN:** DE02 6729 2200 0000 2692 04,
BIC: GENODE61WIE

Alternativ bitte ich darum, **die Arbeit der Landeskirchlichen Gemeinschaft Schlossplatz 9 in Schwetzingen zu unterstützen.** Die Landeskirchliche Gemeinschaft „Schlossplatz 9 in Schwetzingen ist eine evangelische Gemeinde und gehört zum Südwestdeutschen Gemeinschaftsverband e. V. (SGV) mit Sitz in Neustadt/Weinstraße. Der SGV ist ein freies Werk innerhalb der Evangelischen Landeskirche. Ich gehöre dieser Gemeinschaft nicht selber an, und es gibt auch keinen Zusammenhang zwischen der Gemeinde und der Glaubensstimme, doch weiß ich mich ihr im selben Glauben verbunden.

LANDESKIRCHLICHE GEMEINSCHAFT „SCHLOSSPLATZ 9“ 68723
SCHWETZINGEN

Gemeinschaftspastor: M. Störmer, Mannheimer Str. 76,
68723 Schwetzingen,

IBAN: DE62 5206 0410 0007 0022 89
Evangelische Bank eG, Kassel

Andreas Janssen
Im Kreuzgewann 4

69181 Leimen

Natürlich suche ich immer noch Leute, die Zeit und Lust haben, mitzuarbeiten - wer also Interesse hat, melde sich bitte. Meine Email-Adresse ist: webmaster@glaubensstimme.de. Insbesondere suche ich Leute, die Texte abschreiben möchten, bestehende Texte korrigieren oder sprachlich überarbeiten möchten oder die Programmierkenntnisse haben und das Design der Glaubensstimme verschönern können.

Table of Contents

Vorwort

Brenz, Johannes - Das teglich Gebet,

Vater vnser der du bist im Himmel.

I. Geheiliget werde dein Name.

II. Zukomm dein Reich.

III. Dein wille geschehe auff Erden/ wie im Himel.

IIII. Vnser teglich Brodt gib vns heute.

V. Vergib vns vnser Schulde/ als auch wir vergeben vnsern schuldigern.

VI. Vnd füre vns nicht ein in versuchung.

VII. Sondern erlöse vns vom übel.

Denn dein ist das reich/ vnd die krafft/ vnd die herrligkeit in ewigkeit/ Amen.

Quellen:

Inhaltsverzeichnis

Vorwort	1
Brenz, Johannes - Das teglich Gebet,	2
Vater vnser der du bist im Himmel.	2
I. Geheiliget werde dein Name.	4
II. Zukomm dein Reich.	6
III. Dein wille geschehe auff Erden/ wie im Himel.	7
III. Vnser teglich Brodt gib vns heute.	8
V. Vergib vns vnser Schulde/ als auch wir vergeben vnsern schuldigern.	10
VI. Vnd füre vns nicht ein in versuchung.	12
VII. Sondern erlöse vns vom übel.	13
Denn dein ist das reich/ vnd die krafft/ vnd die herrligkeit in ewigkeit/ Amen.	13
Quellen:	15
Table of Contents	17